

Reglur um styrki til nema í leikskólakennarafræðum í Rangárþingi eystra

1. gr. Gildissvið

Reglur þessar gilda um nema í Rangárþingi eystra sem leggja stund á háskólanám í leikskólakennarafræðum og annað hvort vinna í leikskólanum Örk eða hafa áform um að gera það.

2. gr. Markmið

Markmið með reglum þessum er að fjölga fagmenntuðu starfsfólki í leikskólanum Örk þannig að 2/3 hlutar starfsmanna séu leikskólakennarar, eins og áskilið er í lögum um leikskóla nr. 90/2008.

3. gr. Styrkhæft nám

Reglur þessar gilda um styrk til eftirfarandi náms:

- a) Diplómanám í leikskólafræðum í háskóla; 120 einingar.
- b) Leikskólakennaranám B.Ed. 180 einingar.
- c) Leikskólakennarafræði, M.Ed. 120 einingar (veitir rétt til leyfisbréfs)
- d) Framhaldsnám til M.Ed. fyrir starfandi leikskólakennara 120 einingar
- e) Annað viðurkennt nám í leikskólakennarafræðum

Nemendur sem jafnframt eru starfsmenn leikskólans Arkar eru styrktir til fjarnáms. Nemendur sem ekki eru starfsmenn leikskólans Arkar ertu styrktir til staðnáms eða fjarnáms.

4. gr. Styrkþegar og umsóknir

Umsækjandi skal eiga lögheimili í Rangárþingi eystra, eða vera starfsmaður í leikskólanum Örk í a.m.k. 50% starfshlutfalli þegar sótt er um styrk.

Umsókn um styrk skal berast leikskólastjóra mánuði fyrir upphaf haust- eða vorannar á þar til gerðu umsóknarblaði sem finna má á heimasíðu Rangárþings eystra og hjá leikskólastjórum. Í umsókn skulu koma fram nákvæmar upplýsingar um fyrirhugað nám, námstíma og starfsferil umsækjanda. Ber umsækjanda að skila staðfestingu um skólavist með umsókninni eða strax og staðfesting liggur fyrir. Sé umsókn staðfest gerir leikskólastjóri sérstakan skriflegan samning við viðkomandi, sem gildir í eitt ár í senn.

5. gr. Styrkur

Stuðningur er fjölþættur og felst í eftirfarandi:

- a. Aðgangur að vinnuherbergi í leikskólanum með aðgangi að tölvum, prentara og ljósritunarvél eftir að vinnudegi lýkur og um helgar.
- b. Launað námsleyfi í staðlotum, verknámi, á prófdögum og í áföngum með mætingarskyldu
- c. Aðgangur að fjarfundastofu til að sækja fyrirlestra, eftir samkomulagi
- d. Frítt bókasafnskort
- e. Aðgangur að námsveri, með nettengingu, án endurgjalds
- f. Eingreiðslur í lok annar hafi nemi staðist áætlaða námsáætlun
- g. Námsmannaafsláttur í sund og líkamsrækt

Stuðningur skv. a) og b) liðum gildir eingöngu um nema sem jafnframt eru starfsmenn leikskólans Arkar.

6. gr. Fjárhæð eingreiðslna

Eingreiðsla til nema sem jafnframt er starfsmaður leikskólans Arkar nemur að hámarki kr. 60.000 hvert sinn (m.v. 30 staðnar ECTS einingar)

Eingreiðsla til nema sem starfar ekki á námstíma í Leikskólanum Örk nemur kr. 36.000 hvert sinn (m.v. 30 staðnar ECTS einingar).

Eingreiðsla fyrir lokna áfanga skal greidd hlutfallslega ef nemi lýkur færri einingum þó aldrei færri en 15 ECTS einingum.

7. gr. Styrktími

Námsstuðnings nýtur við þann tíma telst eðlileg námsframvinda sbr. f-lið 5. gr. Tefjist nám vegna sérstakra aðstæðna, framlengist stuðningurinn. Upplýsingum um námsframvindu skal komið til leikskólastjóra í lok hverrar annar.

8. gr. Skyldur styrkþega

Styrkþegi skuldbindur sig til að starfa við leikskólann Örk í a.m.k. tvö ár eftir að námi lýkur. Starfshlutfall þarf að vera minnst 75% . Hætti starfsmaður störfum við leikskólann innan áðurnefnds tíma eða ljúki hann ekki námi, hefur Rangárþing eystra heimild til þess að krefjast endurgreiðslu á veittum styrk frá síðasta skólaári nemans.

9. gr. Takmarkanir

Fjöldi nema sem nýtur stuðnings til náms í leikskólakennarafræðum ræðst af þörf Rangárþings eystra fyrir faglært starfsfólk í leikskólanum Örk á hverjum tíma. Leikskólastjóri og sveitarstjórn áskilja sér rétt til að hafna umsóknum. Leikskólastjóri getur hafnað styrkumsókn, hátti þannig til að starfsemi leikskólans beri ekki forföll vegna náms starfsmanna.

Njóti nemi styrkja frá öðru sveitarfélagi vegna sama náms á hann ekki rétt á styrk samkvæmt reglum þessum.

10. gr. Álitamál

Verði verulegar breytingar á fyrirkomulagi fjarnáms eða á persónulegum högum nema getur sveitarstjóri í umboði sveitarstjórnar veitt frávik frá reglum þessum. Sveitarstjórn úrskurðar í álitamálum sem upp kunna að koma við framkvæmd þessara reglna.

11. gr. Gildistími

Reglur þessar gilda til 1. júní 2020.

Reglur þessar öðlast gildi við samþykkt þeirra í byggðarráði Rangárþings eystra.

Samþykkt í byggðarráði 13.08. 2015